

Donostian, Diputazioan, 1966 maiatzaren 27-an.

Bildu dira: Dassance, buru, Labayen, Satrustegi, San Martin, Haritschelbar, Larzabal, Villasante, Lafitte, Arrue, Zavala eta Irigoyen euskaltzaiñak. Oregi, Oleaga, Zatarain, Arregi, Juan Garmendia, Gereño, Altuna eta Goenaga laguntzailleak.

Lekuona, Irigaray eta Olaizola-k ezin etorria adierazi dute.

Iztegiaren a letraz jardun da. Lafitte, Villasante eta Zatarain-ek zerbait ekarri dute eta bana banaka gauzak ikusirik batzarrean zerbait prestatu da. Kopia atera eta zabal bitez.

Arruza il da. Euskaltzaindiaren dolu miña adieraz bekie etxeokoi.

Aurreko agiria irakurri eta ontzat artu da.

«Caja de Ahorros Provincial de Guipúzcoa»-k egin digun karta irakurri da urteroko Xenpelar eta Lizardi sariez.

University of Idaho-ren karta irakurri da ondoren eta esaten digute nola beren bibliotekarako euskal liburuak biltzen ari diran eta gureak «Librería Manterola»-ren bidez bialtzeko. Ala egin bedi.

Irigoyen-ek dio nola «Colegio Resurrección María de Azkue» izenarekin zabalduko dan datorren astean eskola azkenez. Bizkaiko Diputazioak bialdu digun ofizio bat irakurri da laguntasuna eskeiñaz. Eskerrrak eman bekizkio.

Udarregi-ri Usurbil-en egin zaion gorazarreaz mintzatu da eta esan da Xenpelar sariak partitu zirala bertan.

Eibar-en egindako festaz ere itz egin da.

Euba-n maiatzaren 1-ean eta Nafarroako Igantzin maiatzaren 15-ean bertsolari txapelketak egin dira. Bergara-n maiatzaren 30-ean eta Lakuntza-n datorren illeko 19-an egitekoak dira.

Irigoyen-ek esan du Gerediaga alkartadekoekin itz egin duela Kirikiño-ren gorazarreaz. San Martin-ek ain zuzen ere programa moduko bat dakar eta aiek izendatu duten komisió bat aipatzen du. Bertan Anai Berriotxo eta bera ere izendatuak daude. Urriko batzarrea Mañari-n egin beharko litzake igande batez. Atsegiñez ikusten da gutzia eta eman bitez behar diran urratsak.

Oleaga-k Bilbon egindako billeraren berri eman du. An egon ziranen iritzi noizean bein Bilbon ere egin behar litzuke Euskaltzaindiak batzarreak. Era datorrean egiten asi bedi. Gaiñera Kerexeta-ren karta bat irakurri da —billera artan izan zan— eta dio prestatuak daukala zenbait gai enziklopedia modura eskoletako aurrentzat eta argitaratzeko asmotan dala eta eztuela eragozpenik Euskaltzaindiaren ardurapean argitaratzeko. Izendatu gelditzen da bera ere eskoletako liburuen saillekoa. Itz egin beza aiekin nola egin ditekian estudio dezaten.

Besterik gabe oi dan oitizarekin asi eta bukatu da batzarrea.

Euskaltzainburuordea

L. DASSANCE

Idazlariordea

ALFONSO IRIGOYEN

- A. 1. Euskal iztegiko lehen letra.
 2. Oiu itza. Sendimendu bizi asko sala ditzake doiñuaren araura, ala nola arritzea, duda, oiñazea, bihotz miña eta poza. Dobra ditek: *Azkenean aitortzen duzu, aa!*
 3. Izketan ari diranen urrean eztagoanaren izen ordekoa. Irugarren persona.

4. Atzizkia. Atzizki onek enplegu aunitz ditu. Geienetan izena mugatzen du adierazik bakuna dala eta ezagutua. / Atzizki orren bidez izen gisa erabil ditezke esanera mota geienak: *Zeru orren urdiña, itxasoaren zabala, gizon orren etorria!* / Erakuts izen ordetzat erabil ditezke *-en, -ko* eta *-n* atzizkien ondotik: *aitarena, errikoa, duzuna.* / Askotan bakuntasuna salatzen du (L. BN. Z.): *Duela urtea (orain urte bete).* / Atzizki orrek eztu beti itza mugatzen: *Nere andrea andre ona da.* / Zenbait kasutan moltsoa adierazten du: *Erlea amaren inguruan biltzen da oso osoa.* / Jabe itzaren ordetzkotzat egiten du: *Aita semea maite du.* / Estatu iraunkor bat adieraz dezake: *eri da -eria da; erori da - eroria da.* / Atzizki orrek adverbioa ere egiten du: *ixil ixila. abalik ederkiena* (L. BN.). / Galdezkoa (L. BN. Z. E.): *Eldu biza? Baduka burutik? Baia? Eza? Gor niza ala entzun dut? Errandeadazia?* / Nora janten dan erakusten duen atzizkia: *Arizkuna* (Arizkuner) *Zizurkilla, Zara. 'za.*

Donostian, Diputazioan, 1966-VI-24.

Bildu dira: Lafitte, buru, Villasante, Haritschelhar, Larzabal, Satrustegi, Irigaray, Lojendio eta Irigoyen euskaltzaiñak. Lopez Mendizabal ohorezkoa ere egon da. Etxaniz, Garmendia, Arregi, Beobide, Aresti, Loidi, Zatarain, Oregi, Fernando Mendizabal laguntzaileak.

Oleaga eta San Martin-ek ezin etorria adierazi dute.

Itzegiaz jardun da. Lan batzuek ekarri dira. Nola jarri behar dan itzen ordena, nolako itzak sartu behar diran eta *b* letrarekin nola jokatu izan dira erabili diran gaiak batez ere. Sar bitez itz guztiak. Azalpena egin bedi ordena alfabetikoz lendarbizi datorren itzean, dituen aldakuntzak ere aipaturik eta geroago bakoitza sarturik ordenaz tokatzen zaion lekuan. Ezta esango zein itz dan erabilgarrien. Orrela itz batzuek *b*-kin eta *b* gabe bietan ipiñiko dira, baldin ala erabiltzen badira eta beste klase bateko aldakuntzetan berdin. Bialtzen diran lanak multikopistaz atera bitez gero batzarrean tratatzeko.

F. Mendizabal mintzatu da egiten ari dan euskal gramatika batez. Ikasleen artean dituen esperientziak azaldu ditu eta euskerazko gramatika-terminolojiak zenbait iritzi eman ditu.

Lopez Mendizabal jauna agertu da eta guztiak agurtu dute. Lafitte-k itz batzuek zuzendu dizkio bere ohoretan eta berak erantzun egin dio.

Aurreko batzarreko agiria irakurri da eta ontzat artu da.

Irigaray-k Kerexeta-ren lanaz zenbait gauza esan ditu. Batzordekoen eskuetan utzi da iritzi bat ekar dezaten.

San Martin-en karta bat irakurri da Kirikiño-ren omenaldia dala-ta. Gerediaga alkartadekoak nahi dute Mañaria-n egin dedin Euskaltzaindiaren urriko batzarrea. Egin bedi. Aiei karta baten bidez esatea komeni litzake eta ala egin bedi gure babesa ere izango duela omenaldiak aipaturik.

Irigoyen-ek dio Bilboko eskola zabaldu dala eta Apezpiku jauna izan zala lokalen bedeinkazioa egiten. Bertan egon ziran Euskaltzaindikoan artean Bizkaiko Diputazioko ordezkari bat eta irakaskintzaren lenengo maillako inspektorea. Apezpiku jaunak zenbait itz esan zituen euskeraren alde eta eskerrak eman zitzaizkion bertan. Itxura danez eskola berriak zabaltzeko bidea egiña dago Euskaltzaindiaren babesarekin izatekotan eta zenbait lekutan paperak egiten ari dira.